

METODOLOGI PENULISAN *BULŪGH AL-MARĀM* SEBAGAI KITAB ḤADĪTH AL-AḤKĀM

Oleh
Ishak Hj. Sulaiman*

Abstract

Kitab Bulūgh al-Marām is regarded as a source of reference of Ḥadīth al-Aḥkām and written by Ibn Ḥajar al-'Asqalāni, a Ḥadīth scholar who lived in the 8th century of Hijrah. This article is focussed on Bulūgh al-Marām's methodology including the contents and arrangement of each book and chapter, and also the use of specific terms for its Ḥadīth.

MUQADDIMAH

Kitab ini dipilih sebagai satu fokus kajian kerana merupakan sebuah kitab yang menghimpunkan matan-matan Ḥadīth terpilih yang menjurus terhadap hukum-hukum Islam. Pengarangnya, Ibn Ḥajar telah menyebutkan di dalam *muqaddimah* kitab ini bahawa *Bulūgh Al-Marām* merupakan sebuah karya ringkasan yang meliputi dalil-dalil dari ḥadīth di dalam hukum-hukum syariah.¹

Matan-matan Ḥadīth yang dikumpulkan di dalam kitab ini telah dikategorikan pula mengikut tajuk dan bab-bab yang tertentu. Berdasarkan ciri-ciri tersebut, Kitab *Bulūgh Al-Marām* boleh dikategorikan sebagai kitab *matan al-Ḥadīth* yang berwibawa dan berautoriti sebagai rujukan teks ḥadīth, walaupun tidak setanding dengan Kitab-kitab *matan al-Ḥadīth* yang sudah terkenal seperti *Ṣaḥīḥ al-Bukhāri* dan *Ṣaḥīḥ Muslim*.

Di dalam penulisan ini, tumpuan terhadap *Bulūgh Al-Marām* akan dilihat dari sudut definisi, sumber rujukan atau pengambilan ḥadīth-hadīth di dalamnya dan metodologi atau teknik penyusunan ḥadīth-hadīth yang meliputi setiap bab.

DEFINISI *BULŪGH AL-MARĀM*

Sudah menjadi kebiasaan bagi para 'ulama Islam meletakkan tajuk karya mereka

* Pensyarah di Jabatan Al-Quran & Al-Hadīth, Akademi Pengajian Islam, Universiti Malaya.

¹ Ibn Ḥajar, *Bulūgh al-Marām*, Dār al-Salām, Riyāḍ: 1413H/1992M, h.7.

dengan sesuatu pengertian. Daripada tajuk karya tersebut dapat diketahui tujuan penulis menghasilkan karyanya. Tajuk-tajuk karya kebiasaannya terdiri daripada rangkai kata yang terpilih dan bersifat simbolik. Sehubungan dengan itu, Ibn Hajar telah memilih nama *Bulūgh Al-Marām* sebagai tajuk utama karya beliau di bidang *matan al-ḥadīth*.

Perkataan *bulūgh* berasal dari kata kerja *balagha* yang bermaksud sampai.² Perkataan *al-marām* berasal daripada perkataan *ramy* yang ditambah huruf *mim* di awal perkataan, maka ia menjadi *marām* yang bererti kehendak atau tuntutan.³

Berhubung dengan maksud *Bulūgh Al-Marām* yang menjadi tajuk karya Ibn Hajar, al-Ṣanʿāni (m.1182H/1768M) telah menghuraikannya di dalam kitabnya *Subul al-Salām*. Menurut al-Ṣanʿāni yang dimaksudkan dengan *Bulūgh al-Marām* ialah seseorang pelajar yang dapat mencapai atau menguasai perkara yang dituntutnya daripada dalil-dalil *ahkām*.⁴ Daripada penjelasan ini dapatlah difahami akan maksud bagi tajuk *Bulūgh al-Marām* yang dihasilkan oleh Ibn Hajar.

METODOLOGI PENULISAN ḤADĪTH

Di dalam topik ini tumpuan akan diberikan terhadap metodologi penulisan ḥadīth-ḥadīth di dalam *Bulūgh al-Marām* yang berkaitan dengan bilangan ḥadīth, penyusunan kitab dan bab, penggunaan istilah-istilah dan kategori ḥadīth yang terkandung di dalamnya.

1. Bilangan Ḥadīth-ḥadīth

Mengetahui bilangan ḥadīth-ḥadīth merupakan satu aspek penting yang ditekankan oleh 'ulama ḥadīth di dalam melakukan kajian terhadap sesebuah karya *matan ḥadīth*. Melalui cara ini akan dapat dinilai kepakaran dan keilmuan penyusun kitab ḥadīth tersebut di dalam mengkategorikan ḥadīth-ḥadīth pilihannya.

Berhubung dengan bilangan ḥadīth-ḥadīth di dalam *Bulūgh al-Marām*, terdapat perbezaan pendapat di kalangan pengkaji ḥadīth kontemporari bagi menentukan bilangannya yang tepat. Menurut pendapat Muhammad Rashad Khalifah, terdapat 1,373 ḥadīth yang asal iaitu ḥadīth yang tidak bercampur-campur yang berdasarkan dari ungkapan "*wa fi riwayat fulan...*" dan sebagainya. Manakala ḥadīth yang bercampur-campur terdapat sebanyak 131 ḥadīth di dalam *Bulūgh al-Marām*.⁵

² Ibn Manzūr, *Lisān al-ʿArāb*, Jil.4, h.87.

³ *Ibid.* Jil. 6., h.103.

⁴ al-Ṣanʿāni, *Subul al-Salām*, 1968M, Jil.1, h.2.

⁵ Muhammad Rashad Khalifah, *Madrasah al-Ḥadīth fi Miṣr*, Qaherah; 1983, h.447.

Berdasarkan pendapat Abu Zahw pula bilangan ḥadīth-ḥadīth di dalam *Bulūgh al-Marām* berjumlah 1,400 ḥadīth yang diambil dari sumber rujukan yang disusun di dalam setiap bab.⁶

Manakala di dalam kitab *Bulūgh al-Marām* yang diedit oleh Muhammad Hamid al-Fiqi, kesemua ḥadīth tersebut berjumlah 1,596 ḥadīth.⁷ Bilangan ini sebenarnya berdasarkan bilangan matan al-ḥadīth yang bercampur-campur seperti yang terdapat di dalam *Bulūgh al-Marām*.

Kepelbagaian pendapat di kalangan ‘ulama berhubung hal ini disebabkan cara menentukan bilangan bagi ḥadīth-ḥadīth termasuklah ḥadīth yang berulang-ulang tidak sama di antara mereka. Daripada pendapat yang pelbagai ini sebenarnya anggaran bagi bilangan ḥadīth di dalam *Bulūgh al-Marām* sudah dapat dipastikan apabila kesemua pendapat ini mengangarkan jumlah keseluruhannya ialah sebanyak seribu lebih. Perbezaan pendapat mereka di dalam hal ini hanyalah untuk menentukan bilangan yang tepat selepas angka 1,000. Oleh yang demikian, secara umumnya boleh dianggarkan bahawa bilangan ḥadīth-ḥadīth di dalam *Bulūgh al-Marām* ialah lebih daripada 1,000 ḥadīth.

2. Penyusunan Kitab dan Bab

Di dalam *Bulūgh al-Marām* kesemua ḥadīth telah dikategorikan berdasarkan Kitab dan Bab. Berhubung dengan penggunaan istilah *kitab* di dalam *Bulūgh al-Marām*, al-Ṣan‘āni telah menghuraikannya di dalam sebuah karya yang bertajuk *Subul al-Salām* yang merupakan sebuah kitab yang menghuraikan dan membuat ulasan terhadap Ḥadīth-ḥadīth di dalam *Bulūgh al-Marām*.⁸

Menurut al-Ṣan‘āni, penggunaan istilah kitab telah digunakan secara meluas oleh ‘ulama ḥadīth yang menjadikannya sebagai tajuk bagi masalah-masalah khusus di dalam fiqh.⁹ Sehubungan dengan itu di dalam *Bulūgh al-Marām* Ibn Hajar telah menyusun kesemua ḥadīth yang berkaitan masalah fiqh di dalam 16 kitab.¹⁰ Bilangan sebanyak ini adalah berdasarkan kepada kandungan asal seperti yang terdapat di dalam *Bulūgh al-Marām*.

⁶ Abu Zahw, (Dr.), *al-Ḥadīth wa al-Muḥaddīthūn*, Riyad;1980, h.447.

⁷ Ibn Hajar, *Bulūgh al-Marām*.

⁸ al-Ṣan‘āni, *Subul al-Salām: Sharḥ Bulūgh al-Marām min adillah al-Aḥkām* Qaherah, 1960, 4 juzu’.

⁹ *Ibid*, h.14.

¹⁰ Ibn Hajar, *Bulūgh al-Marām*, h.2.

Enam belas kitab yang terdapat di dalam *Bulūgh al-Marām* ialah seperti berikut:

1. Kitab *al-Taḥārah*
2. Kitab *al-Ṣolāt*
3. Kitab *al-Janā'iz*
4. Kitab *al-Zakāh*
5. Kitab *al-Ṣiyām*
6. Kitab *al-Ḥājj*
7. Kitab *al-Buyū'*
8. Kitab *al-Nikāh*
9. Kitab *al-Jināyah*
10. Kitab *al-Hudūd*
11. Kitab *al-Jihād*
12. Kitab *al-Aṭ'imah*
13. Kitab *al-Ayman wa al-Nudhūr*
14. Kitab *al-Qada'*
15. Kitab *al-'Itq*
16. Kitab *al-Jamī'*

Sebagaimana yang disebutkan di awal perbincangan, penggunaan istilah kitab di dalam mana-mana karya matan al-ḥadīth bertujuan untuk menamakan tajuk yang penting di dalam masalah fiqh. Di samping itu, ḥadīth-ḥadīth yang terdapat di dalam setiap kitab akan dikategorikan mengikut bab yang tertentu.

Berhubung dengan penggunaan bab di dalam *Bulūgh al-Marām*, Ibn Hajar telah menyusun 97 bab yang meliputi berbagai persoalan fiqh yang terkandung di dalam setiap kitab.

Di dalam Kitab *Subul al-Salām* yang dihasilkan oleh al-Ṣan'āni telah menerangkan mengenai penggunaan bab di dalam kitab tersebut. Menurut al-Ṣan'āni, dari sudut bahasa *al-bāb* bererti sesuatu tempat untuk keluar dan masuk.¹¹

Di samping itu beliau telah membawa dua dalil dari Al-Quran yang berhubung dengan penggunaan kalimah *al-bāb*. Dalil pertama ialah (*ادْخُلُوا عَلَيْهِمُ الْبُيُوتَ*)¹² yang bererti “masuklah kamu melalui pintu kota itu”. Dalil kedua ialah (*وَأْتُوا الْبُيُوتَ مِنْ أَبْوَابِهَا*)¹³ yang bermaksud “dan masuklah ke dalam rumah-rumah itu melalui pintu-pintunya”.

¹¹ al-Ṣan'āni, *Subul al-Salām*, Jil.1, h.14.

¹² Al-Quran, al-Maidah: 23.

¹³ *Ibid*; al-Baqarah:189.

Bagi menjelaskan tujuan penggunaan bab di dalam *Bulūgh al-Marām*, Al-Ṣanʿāni telah membuat satu huraian yang lengkap. Menurut beliau, penggunaan kalimah *al-bāb* di dalam *Bulūgh al-Marām* hanyalah berbentuk *majāz* atau kata pinjaman sahaja.¹⁴ Ini disebabkan terdapat persamaan kalimah *al-bāb* yang bererti pintu atau tempat masuk untuk mendalami masalah-masalah khusus dengan kalimah *al-bāb* yang bererti pintu atau tempat masuk ke dalam tempat-tempat khusus.¹⁵ Justeru itu, penggunaan kalimah *al-bāb* ini bertujuan bagi menghuraikan masalah-masalah fiqh tersebut secara terperinci.

Memandangkan *Bulūgh al-Marām* merupakan sebuah kitab ringkasan *ḥadīth-ḥadīth* hukum, maka bab-bab yang disusun di dalamnya merupakan bab yang terpenting sahaja menurut perkiraan penyusunnya iaitu Ibn Ḥajar.

TAKHRĪJ AL-ḤADĪTH

Berdasarkan *Muqaddimah* di dalam *Bulūgh al-Marām*, Ibn Ḥajar telah menyebut seramai tujuh orang tokoh 'ulama *ḥadīth* yang dijadikan sebagai *Takhrīj Al-Ḥadīth* atau tempat pengambilan *ḥadīth-ḥadīth* yang disusun di dalam kitabnya *Bulūgh al-Marām*. Tujuh orang tokoh 'ulama *ḥadīth* tersebut ialah Ahmad bin Hanbal (m.241H), al-Bukhārī (m.256H), Muslim (m.261), Abu Dāwūd (m.275H), al-Turmudhi (m.279H), al-Nasā'ī (m.303H) dan Ibn Mājah (m.273H atau 275H).¹⁶

Selain daripada tujuh orang tokoh 'ulama *ḥadīth* yang dijadikan sebagai sumber rujukan utama di dalam menyusun kitabnya *Bulūgh al-Marām*, Ibn Ḥajar juga merujuk kepada 'ulama-'ulama *ḥadīth* lain seperti berikut:¹⁷

- 1) Ishāk b. Rāhuwayh (m.238H)
- 2) Al-Isma'il Ahmad b. Ibrahim (m.371H).
- 3) Al-Bazar atau Ahmad b. Amru (m.292H)
- 4) Al-Bayhaqi atau Ahmad b. Amru (m.2921H)
- 5) Ibn al-Jarud atau Abdullah b. Ali (m.307H)
- 6) Abu Ḥatim al-Rāzi atau Muhammad b. Idris (m.277H)
- 7) Al-Ḥarīth b. Abi Usāmah (m.282H)
- 8) Abu Abdullah al-Ḥakim (m.405H)
- 9) Abu Ḥatim Muhammad b. Hibban (m.354H)

¹⁴ al-Ṣanʿāni, *Subul al-Salām*, Jil.1, h.14.

¹⁵ *Ibid.*

¹⁶ Ibn Ḥajar, *Bulūgh al-Marām*, h.460.

¹⁷ *Ibid.*

- 10) Muhammad b. Ishāk b. Khuzaimah (m.311H)
- 11) Ibn Abi Khaythamah (m.289H)
- 12) Al-Dāraqutni (m.385H)
- 13) Al-Dārimi (m.355H)
- 14) Sulayman b. Daud (m.204H)
- 15) Abdullah b. Muhammad b. Abid (m.281H)
- 16) Al-Zuhli (m.258H)
- 17) 'Abidallah b. 'Abd Karim (m.265H)
- 18) Sayd b. Mansur (m.227H)
- 19) Said b. Uthman (m.353H)
- 20) Al-Shāfi'i (m.204H)
- 21) Abu Bakr b. Abi Shaybah (m.235H)
- 22) Al-Ṭabrāni (m.360H)
- 23) Al-Ṭahāwi (m.321H)
- 24) Ibn 'Abd al-Barr (m.463H)
- 25) 'Abd al-Haq (m.571H)
- 26) 'Abd al-Razak b. Hamam (m.211H)
- 27) Ibn 'Adi (m.365H)
- 28) Muḥammad b. Amru (m.322H)
- 29) 'Ali b. al-Madani (m.234H)
- 30) Ya'qūb b. Ishāk (m.316H)
- 31) Ibn al-Qattan (m.628H)
- 32) Al-Imām Mālik (m.189H)
- 33) Ibn Mandah atau Muḥammad b. Ishāk (m.395H)
- 34) Abu Naim al-Asfahani (m.430H)
- 35) Abu Ya'la atau Aḥmad b. Ali (m.307H).

Daripada 42 orang muḥaddīthin atau tokoh 'ulama ḥadīth iaitu 7 orang tokoh utama dan 35 orang para ulama seperti yang dinyatakan di atas, maka Ibn Hajar telah menyusun ḥadīth-ḥadīth di dalam *Bulūgh al-Marām*. Selain daripada tokoh-tokoh 'ulama yang dijadikan sebagai sumber rujukan di dalam *Bulūgh al-Marām*, Ibn Hajar juga telah menggunakan seramai 352 orang *rijal* yang terdiri daripada sahabat-sahabat Nabi SAW.¹⁸

Berdasarkan ḥadīth-ḥadīth yang diriwayatkan oleh tokoh-tokoh 'ulama di atas, maka Ibn Hajar telah menyusun ḥadīth-ḥadīth tersebut berdasarkan tajuk yang

¹⁸ Lihat Ibn Hajar, *Bulūgh al-Marām*, h.475.

dinamakan sebagai “*kitab*” dan “*bab*” di dalam *Bulūgh al-Marām*. Sehubungan itu, perbincangan seterusnya akan menyentuh mengenai penggunaan ḥadīth-hadīth yang diriwayatkan oleh 7 orang tokoh utama yang dirujuki oleh Ibn Hajar di dalam setiap kitab yang terdapat di dalam *Bulūgh al-Marām*. Melalui cara ini akan dapat dibuktikan penelitian Ibn Hajar di dalam menyusun setiap ḥadīth yang berkaitan dengan topik bagi sesuatu bab dan kitab.

1. Aḥmad bin Ḥanbal.

Nama sebenar beliau ialah Abu Abdullah Aḥmad bin Muhammad bin Ḥanbal bin Hilal al-Shaibāni. Beliau dilahirkan pada bulan Rabi‘ al-awwal tahun 164H di Baghdad. Ibu bapa Imam Aḥmad berasal dari Marwa, Khurasan. Beliau meninggal dunia pada hari Jumaat, 12 Rabi‘ al-awwal tahun 241H di Baghdad ketika beliau berumur 77 tahun.¹⁹

Di dalam *Bulūgh al-Marām*, Ibn Hajar telah mengambil sebilangan ḥadīth-hadīth yang diriwayatkan oleh Imam Aḥmad Ḥanbal dan diletakkan di dalam setiap kitab seperti berikut:

1. Kitab <i>al-Tahārah</i>	: 29 Ḥadīth
2. Kitab <i>al-Ṣolāt</i>	: 79 Ḥadīth
3. Kitab <i>al-Janāiz</i>	: 08 Ḥadīth
4. Kitab <i>al-Zakāh</i>	: 04 Ḥadīth
5. Kitab <i>al-Ṣiyām</i>	: 11 Ḥadīth
6. Kitab <i>al-Hājj</i>	: 10 Ḥadīth
7. Kitab <i>al-Buyū’</i>	: 35 Ḥadīth
8. Kitab <i>al-Nikāḥ</i>	: 33 Ḥadīth
9. Kitab <i>al-Jināyah</i>	: 09 Ḥadīth
10. Kitab <i>al-Hudūd</i>	: 09 Ḥadīth
11. Kitab <i>al-Jihād</i>	: 11 Ḥadīth
12. Kitab <i>al-At’imah</i>	: 11 Ḥadīth
13. Kitab <i>al-Ayman wa al-Nudhūr</i>	: 04 Ḥadīth
14. Kitab <i>al-Qada’</i>	: 06 Ḥadīth
15. Kitab <i>al-’Itq</i>	: 05 Ḥadīth
16. Kitab <i>al-Jamī’</i>	: 06 Ḥadīth.

¹⁹ al-Baghdādī, *Tarīkh al-Baghdād*, Jil.4, h.412 dan Ibn Khālikan, *Wafāyat al-’Ayan*, Jil.1, h.17.

2. al-Bukhāri.

Nama sebenar beliau ialah Abū ‘Abd Allah Muḥammad Abu al-Hasan ‘Ismāil Ibrāhim b. al-Mughīrah Bardizbah al-Jāfi al-Bukhāri.²⁰ Imam Bukhāri dilahirkan di Bukhāra pada tahun 194H (910M) dan meninggal dunia pada tahun 256H (870M) di Samarqand.²¹

Di dalam *Bulūgh al-Marām*, Ibn Ḥajar telah mengambil sebilangan ḥadīth-ḥadīth yang diriwayatkan oleh Imam al-Bukhāri dan diletakkan di dalam setiap kitab seperti berikut:

1. Kitab <i>al-Ṭahārah</i>	: 47 Ḥadīth
2. Kitab <i>al-Ṣolāt</i>	: 136 Ḥadīth
3. Kitab <i>al-Janāiz</i>	: 22 Ḥadīth
4. Kitab <i>al-Zakāh</i>	: 16 Ḥadīth
5. Kitab <i>al-Ṣiyām</i>	: 25 Ḥadīth
6. Kitab <i>al-Ḥājj</i>	: 65 Ḥadīth
7. Kitab <i>al-Buyū’</i>	: 69 Ḥadīth
8. Kitab <i>al-Nikāh</i>	: 60 Ḥadīth
9. Kitab <i>al-Jināyah</i>	: 14 Ḥadīth
10. Kitab <i>al-Ḥudūd</i>	: 17 Ḥadīth
11. Kitab <i>al-Jihād</i>	: 26 Ḥadīth
12. Kitab <i>al-Aṭ’imah</i>	: 16 Ḥadīth
13. Kitab <i>al-Ayman wa al-Nudhūr</i>	: 12 Ḥadīth
14. Kitab <i>al-Qada’</i>	: 13 Ḥadīth
15. Kitab <i>al-‘Itq</i>	: 08 Ḥadīth
16. Kitab <i>al-Jamī’</i>	: 40 Ḥadīth

3. Muslim al-Ḥajāj.

Nama sebenar beliau ialah Muslim bin al-Ḥajāj bin Muslim al-Qushayrī al-Nisāburi. Beliau dilahirkan di sekitar tahun 206H dan meninggal dunia pada tahun 261H.²² Ḥadīth-ḥadīth yang diriwayatkan oleh Imam Muslim turut dijadikan sebagai sumber rujukan oleh Ibn Ḥajar di dalam *Bulūgh al-Marām*.

²⁰ Ibn Ḥajar, *al-‘Iṣābah*, Jil.1., h.47; al-Baghdādi, *Tārīkh*, Jil.1, h.6 dan Ibn Khālikan, *Wafāyat*, Jil.1, h.455.

²¹ *Ibid*

²² Ibn al-‘Imād, *Shadhrat al-Dhahāb*, Jil.2, h.144 dan Ibn Ḥajar, *al-‘Iṣābah*, Jil.10, h.126.

Di dalam *Bulūgh al-Marām*, Ibn Hajar telah mengambil sebilangan ḥadīth-ḥadīth yang diriwayatkan oleh Imam Muslim dan diletakkan di dalam setiap kitab seperti berikut:

1. Kitab <i>al-Tahārah</i>	: 67 Ḥadīth
2. Kitab <i>al-Ṣolāt</i>	: 174 Ḥadīth
3. Kitab <i>al-Janāiz</i>	: 29 Ḥadīth
4. Kitab <i>al-Zakāh</i>	: 16 Ḥadīth
5. Kitab <i>al-Siyām</i>	: 25 Ḥadīth
6. Kitab <i>al-Hājj</i>	: 42 Ḥadīth
7. Kitab <i>al-Buyū'</i>	: 74 Ḥadīth
8. Kitab <i>al-Nikāḥ</i>	: 60 Ḥadīth
9. Kitab <i>al-Jināyah</i>	: 14 Ḥadīth
10. Kitab <i>al-Hudūd</i>	: 21 Ḥadīth
11. Kitab <i>al-Jihād</i>	: 29 Ḥadīth
12. Kitab <i>al-Aṭ'imah</i>	: 21 Ḥadīth
13. Kitab <i>al-Ayman wa al-Nudhūr</i>	: 13 Ḥadīth
14. Kitab <i>al-Qada'</i>	: 12 Ḥadīth
15. Kitab <i>al-Itq</i>	: 09 Ḥadīth
16. Kitab <i>al-Jamī'</i>	: 58 Ḥadīth

4. Abū Dāwūd.

Nama sebenar beliau ialah Sulaiman al-'Ash'iyyah Ishak Bashir Shadad Amru bin 'Imran al-Azd al-Sijastani. Beliau lebih dikenali sebagai Abū Dāwūd yang dilahirkan pada tahun 203H/817M di Basrah dan meninggal dalam tahun 275H/888M.²³

Di dalam *Bulūgh al-Marām*, Ibn Hajar telah mengambil sebilangan ḥadīth-ḥadīth yang diriwayatkan oleh Abū Dāwūd dan diletakkan di dalam setiap kitab seperti berikut:

1. Kitab <i>al-Taharāh</i>	: 56 Ḥadīth
2. Kitab <i>al-Ṣolāt</i>	: 118 Ḥadīth
3. Kitab <i>al-Janāiz</i>	: 15 Ḥadīth
4. Kitab <i>al-Zakāh</i>	: 20 Ḥadīth
5. Kitab <i>al-Siyām</i>	: 05 Ḥadīth
6. Kitab <i>al-Hājj</i>	: 13 Ḥadīth

²³ al-Ṣan'āni, *al-Ansāb*, Jil.2, h.29; al-Nawāwī, *Tahdhīb al-Asmā wa al-Lughat*, Jil.2.; Ibn Kathir, *al-Bidāyah wa al-Nihāyah*, Jil.2, h.55 dan Ibn Khāllikan, *Wafāyat*, Jil.1, h.271.

7. Kitab <i>al-Buyū'</i>	: 46 Ḥadīth
8. Kitab <i>al-Nikāḥ</i>	: 56 Ḥadīth
9. Kitab <i>al-Jinayāh</i>	: 20 Ḥadīth
10. Kitab <i>al-Ḥudūd</i>	: 13 Ḥadīth
11. Kitab <i>al-Jihād</i>	: 22 Ḥadīth
12. Kitab <i>al-Aṭ'imah</i>	: 10 Ḥadīth
13. Kitab <i>al-Ayman wa al-Nudhūr</i>	: 08 Ḥadīth
14. Kitab <i>al-Qada'</i>	: 12 Ḥadīth
15. Kitab <i>al-Itq</i>	: 06 Ḥadīth
16. Kitab <i>al-Jamī'</i>	: 10 Ḥadīth

5. al-Turmudhī.

Nama sebenar beliau ialah Muhammad b. Isa b. Sawra b. Musa b. al-Dāḥak al-Sulma al-Bughi al-Tirmidhī. Beliau dilahirkan pada kurun 3H di sebuah bandar bernama Tirmidhī pada tahun 209H. Beliau meninggal dunia pada malam Isnin, bulan Rejab tahun 279H.²⁴

Di dalam *Bulūgh al-Marām*, Ibn Hajar telah mengambil sebilangan ḥadīth-ḥadīth yang diriwayatkan oleh al-Turmudhī dan diletakkan di dalam setiap kitab seperti berikut:

1. Kitab <i>al-Taḥarāh</i>	: 36 Ḥadīth
2. Kitab <i>al-Ṣolāt</i>	: 90 Ḥadīth
3. Kitab <i>al-Janāiz</i>	: 12 Ḥadīth
4. Kitab <i>al-Zakāh</i>	: 09 Ḥadīth
5. Kitab <i>al-Ṣiyām</i>	: 09 Ḥadīth
6. Kitab <i>al-Ḥājj</i>	: 08 Ḥadīth
7. Kitab <i>al-Buyū'</i>	: 25 Ḥadīth
8. Kitab <i>al-Nikāḥ</i>	: 30 Ḥadīth
9. Kitab <i>al-Jināyah</i>	: 10 Ḥadīth
10. Kitab <i>al-Ḥudūd</i>	: 09 Ḥadīth
11. Kitab <i>al-Jihād</i>	: 06 Ḥadīth
12. Kitab <i>al-Aṭ'imah</i>	: 08 Ḥadīth
13. Kitab <i>al-Ayman wa al-Nudhūr</i>	: 05 Ḥadīth

²⁴ Ibn Khallikan, *Wafāyat*, Jil.4, h.27, Ibn al-'Imād, *Shadhrat al-Dhahāb*, Jil.2, h.174, al-Dhahābi, *Tadhkirah al-Huffāz*, Jil.2, h.635 dan al-Zarekli, *al-'Alām*, Jil.7, h.213.

14. Kitab <i>al-Qada'</i>	: 07 Ḥadīth
15. Kitab <i>al-'Itq</i>	: 03 Ḥadīth
16. Kitab <i>al-Jamī'</i>	: 30 Ḥadīth

6. *al-Nasā'i*.

Nama sebenar beliau ialah Ahmad b. Shuaib 'Ali Sinan Abu 'Abd. Raḥman al-Nasā'i. Beliau dilahirkan pada tahun 214H di sebuah kota yang bernama Nasa yang terletak di Khurasan. Justeru itu Ahmad bin Shu'aib dikenali sebagai al-Nasā' dan meninggal dunia pada bulan Sha'ban tahun 303H dalam usia beliau 39 tahun.²⁵

Di dalam *Bulūgh al-Marām*, Ibn Hajar telah mengambil sebilangan Ḥadīth-ḥadīth yang diriwayatkan oleh al-Nasā'i dan diletakkan di dalam setiap kitab seperti berikut:

1. Kitab <i>al-Taḥarāh</i>	: 32 Ḥadīth
2. Kitab <i>al-Ṣolāt</i>	: 72 Ḥadīth
3. Kitab <i>al-Janā'iz</i>	: 08 Ḥadīth
4. Kitab <i>al-Zakāh</i>	: 07 Ḥadīth
5. Kitab <i>al-Ṣiyām</i>	: 13 Ḥadīth
6. Kitab <i>al-Hājj</i>	: 05 Ḥadīth
7. Kitab <i>al-Buyū'</i>	: 31 Ḥadīth
8. Kitab <i>al-Nikāh</i>	: 33 Ḥadīth
9. Kitab <i>al-Jināyah</i>	: 18 Ḥadīth
10. Kitab <i>al-Hudūd</i>	: 12 Ḥadīth
11. Kitab <i>al-Jihād</i>	: 08 Ḥadīth
12. Kitab <i>al-Aṭ'imah</i>	: 05 Ḥadīth
13. Kitab <i>al-Ayman wa al-Nudhūr</i>	: 03 Ḥadīth
14. Kitab <i>al-Qada'</i>	: 06 Ḥadīth
15. Kitab <i>al-'Itq</i>	: 05 Ḥadīth
16. Kitab <i>al-Jamī'</i>	: 09 Ḥadīth

7. *Ibn Mājah*.

Nama sebenar beliau ialah Muhammad Yazid al-Rabā'i Ibn Mājah al-Qaza'in. Beliau dilahirkan pada tahun 209H di Qazwin dan meninggal dunia pada akhir bulan Ramadan tahun 273H. Namun demikian terdapat pendapat yang mengatakan Ibn Mājah meninggal dunia pada tahun 275H dan dikebumikan pada keesokan harinya.

²⁵ Ibn Hajar, *Tahdhīb al-Tahdhīb*, Jil.1, h. 226, Ibn Khāllikan, *Wafāyat*, Jil.1, h.77, al-Dhahabi, *Tadhkirah al-Huffāz*, Jil.2, h.270.

Di dalam *Bulūgh al-Marām*, Ibn Hajar telah mengambil sebilangan ḥadīth-ḥadīth yang diriwayatkan oleh Ibn Mājah dan diletakkan di dalam setiap kitab seperti berikut:

1. Kitab <i>al-Taharāh</i>	: 29 Ḥadīth
2. Kitab <i>al-Ṣolāt</i>	: 58 Ḥadīth
3. Kitab <i>al-Janāiz</i>	: 10 Ḥadīth
4. Kitab <i>al-Zakāh</i>	: 05 Ḥadīth
5. Kitab <i>al-Ṣiyām</i>	: 12 Ḥadīth
6. Kitab <i>al-Hājj</i>	: 08 Ḥadīth
7. Kitab <i>al-Buyū'</i>	: 34 Ḥadīth
8. Kitab <i>al-Nikāh</i>	: 35 Ḥadīth
9. Kitab <i>al-Jināyah</i>	: 10 Ḥadīth
10. Kitab <i>al-Hudūd</i>	: 08 Ḥadīth
11. Kitab <i>al-Jihād</i>	: 02 Ḥadīth
12. Kitab <i>al-Aṭ'imah</i>	: 06 Ḥadīth
13. Kitab <i>al-Ayman wa al-Nudhūr</i>	: 02 Ḥadīth
14. Kitab <i>al-Qada'</i>	: 06 Ḥadīth
15. Kitab <i>al-Itq</i>	: 01 Ḥadīth
16. Kitab <i>al-Jamī'</i>	: 08 Ḥadīth

Daripada kenyataan di atas, jelas membuktikan bahawa Ibn Hajar telah menjadikan ḥadīth-ḥadīth yang diriwayatkan dari 7 orang tokoh ulama' tersebut sebagai rujukan utama di dalam penyusunan Ḥadīth-ḥadīth yang terdapat di dalam *Bulūgh al-Marām*. Oleh yang demikian tidak wajar timbul sebarang keraguan terhadap ḥadīth-ḥadīth yang terdapat di dalam kitab ini kerana Ibn Hajar menjadikan 7 orang tokoh 'ulama di atas di samping 'ulama-'ulama ḥadīth yang lain sebagai tempat pengambilan ḥadīth-ḥadīth yang boleh disemak semula tentang kesahihan dan kedudukannya yang sebenar.

PENGGUNAAN ISTILAH-ISTILAH

Berdasarkan *Muqaddimah* di dalam *Bulūgh al-Marām*, Ibn Hajar telah menghuraikan enam istilah khusus yang digunakan di dalam ḥadīth-ḥadīth susunannya. Penggunaan enam istilah tersebut bertujuan untuk menyatakan sumber rujukan ḥadīth-ḥadīth susunannya dari tokoh-tokoh 'ulama ḥadīth. Enam istilah tersebut ialah *al-Sab'ah*, *al-Sittah*, *Al-Khamsah*, *Al-Arba'ah*, *Al-Thalathah* dan *al-Muttafaq 'alayh*. Ibn Hajar menggunakan enam istilah ini untuk kebanyakan ḥadīth di dalam *Bulūgh al-Marām*.

Enam istilah ini sebenarnya menggambarkan tujuh orang tokoh perawi ḥadīth

yang dijadikan sumber rujukan utama terhadap *Ḥadīth-ḥadīth* di dalam *Bulūgh al-Marām*. Tujuh orang tokoh perawi *ḥadīth* tersebut ialah Imam Ahmad bin Hanbal, Imam Bukhārī, Imam Muslim, Imam Abū Dawūd, Imam al-Tirmidhī, Imam Nasā'i dan Imam Ibn Mājah. Di samping itu terdapat juga nama perawi *ḥadīth* selain dari tujuh orang di atas bagi menyatakan sumber rujukan sesuatu *ḥadīth*.

Di dalam topik ini, tumpuan akan diberikan bagi menghuraikan maksud setiap istilah tersebut di samping membawakan contoh *ḥadīth-ḥadīth* yang berkaitan. Di samping itu beberapa contoh yang tidak ada kaitan dengan enam istilah ini akan turut dipaparkan bagi membuat satu perbandingan di antara *ḥadīth-ḥadīth* tersebut.

1. Al-Sab'ah.

Berdasarkan *Muqaddimah* di dalam *Bulūgh al-Marām*, Ibn Hajar telah menerangkan maksud al-Sab'ah ialah tujuh orang tokoh utama *ḥadīth* iaitu Imam Ahmad bin Hanbal, Imam Bukhārī, Imam Muslim, Imam Abū Dāwūd, Imam al-Tirmidhī, Imam Nasā'i dan Imam Ibn Mājah. Penggunaan istilah al-Sab'ah ini bertujuan untuk menyatakan sumber pengambilan sesuatu *ḥadīth* di dalam *Bulūgh al-Marām* tersebut datangnya dari periwayatan tujuh orang tokoh *ḥadīth* seperti yang dinyatakan di atas.

Contoh *ḥadīth* yang menggunakan istilah "*al-Sab'ah*" di dalam *Bulūgh al-Marām* seperti berikut :

عن أبي هريرة رضي الله تعالى عنه، أن النبي ﷺ قال: وإذا
قمت إلى الصلاة، فأبسط الوضوء، ثم استقبل القبلة فكبر، ثم اقرأ ما تيسر معك
من القرآن، ثم اركع حتى تطمئن راكعاً، ثم ارفع حتى تعتدل قائماً، ثم اسجد
حتى تطمئن ساجداً، ثم ارفع حتى تطمئن جالساً، ثم اسجد حتى تطمئن
ساجداً، ثم افعل ذلك في صلاتك كلها. أخرجه السبعة، واللفظ للبخاري.

Maksudnya:

Dari Abi Hurairah RA sesungguhnya Nabi s.a.w telah bersabda; jika kamu hendak melakukan solat, sempurnakanlah wudu', menghadap ke kiblat, membaca Al-Qur'an yang mudah bagimu.....

Ḥadīth riwayat oleh Imam tujuh, lafaz *ḥadīth* ini dari Bukhārī dan Ibn Mājah dengan sanad Muslim.²⁶

²⁶ Ibn Hajar, *Bulūgh al-Marām*, bab Sifat al-Solat, h.77.

2. Al-Sittah.

Menurut Ibn Hajar, al-Sittah bermaksud *Imam Bukhārī*, *Imam Muslim*, *Imam Abū Dāwūd*, *Imam al-Tirmidhī*, *Imam Nasā'i* dan *Imam Ibn Mājah*. Di dalam pengertian al-Sittah terdapat hanya seorang sahaja perawi yang digugurkan iaitu Imam Ahmad bin Hanbal.

Penggunaan istilah al-Sittah bertujuan untuk menyatakan sumber pengambilan sesuatu Ḥadīth tersebut hanya dari enam orang perawi itu di samping mengecualikan periwayatan dari Imam Ahmad bin Hanbal sahaja.

Walaupun istilah al-Sittah ini disebut di dalam *Muqaddimah Bulūgh al-Marām* tetapi setelah dibuat penelitian tiada satu ḥadīthpun yang menggunakan istilah al-Sittah bagi menggambarkan sumber rujukan ḥadīth tersebut.

Ini menunjukkan bahawa Ibn Hajar gagal membuktikan ḥadīth yang diriwayatkan oleh enam orang perawi (*al-Sittah*) iaitu *Imam Bukhārī*, *Imam Muslim*, *Imam Abū Dāwūd*, *Imam al-Tirmidhī*, *Imam Nasā'i* dan *Imam Ibn Mājah* walaupun ianya disentuh di dalam *Bulūgh al-Marām*.

3. Al-Khamsah.

Di dalam *Bulūgh al-Marām* Ibn Hajar telah menerangkan maksud al-Khamsah ialah lima orang perawi ḥadīth iaitu *Imam Ahmad bin Hanbal*, *Imam Abū Dāwūd*, *Imam al-Tirmidhī*, *Imam Nasā'i* dan *Imam Ibn Mājah*. Di dalam pengertian al-Khamsah terdapat dua orang perawi ḥadīth yang digugurkan iaitu Imam Bukhārī dan Imam Muslim. Oleh yang demikian penggunaan istilah al-Khamsah ini bertujuan untuk menyatakan sumber pengambilan sesuatu ḥadīth tersebut hanya dari lima orang perawi seperti yang dinyatakan di atas sahaja.

Contoh ḥadīth yang menggunakan istilah al-Khamsah ialah seperti berikut;

(٢٠٤) وعن عائشة رضي الله تعالى عنها، عن النبي ﷺ، قال: «لا يقبل الله صلاة حائض إلا بخمار». رواه الخمسة إلا النسائي، وصححه ابن خزيمة.

Maksudnya;

Dari 'Aishah r.a bahawasanya Nabi s.a.w bersabda; Allah tidak menerima solat orang yang sudah baligh kecuali dengan menutup aurat.

Ḥadīth riwayat Imam lima kecuali Nasā'i dan Ibn Khuzaimah mensahihkannya.²⁷

²⁷ *Ibid*, Bab Syarat al-Solat, h.63.

4. Al-Arba'ah.

Menurut Ibn Hajar, al-Arba'ah bermaksud *Imam Abū Dāwūd*, *Imam al-Tirmidhī*, *Imam Nasā'i* dan *Imam Ibn Mājah*. Di dalam pengertian al-Arba'ah, terdapat tiga orang perawi *hadīth* yang digugurkan iaitu Imam Ahmad bin Hanbal, Imam Bukhārī dan Imam Muslim. Sehubungan dengan itu penggunaan istilah ini bertujuan untuk menyatakan sumber pengambilan sesuatu *hadīth* hanya dari empat orang perawi seperti yang dinyatakan di atas sahaja.

Contoh *hadīth* yang menggunakan istilah al-Arba'ah ialah seperti berikut:

(٢٢٤) وعن أبي هريرة رضي الله تعالى عنه قال: قال رسول الله ﷺ: «اقتلوا الأسودين في الصلاة: الحية والعقرب». أخرجه الأربعة، وصححه ابن حبان.

Maksudnya:

Daripada Abu Hurairah ia berkata bahawasanya Nabi s.a.w bersabda: Bunuhlah dua aswad iaitu ular dan kala.

Hadīth riwayat Imam empat dan disahihkan oleh Ibn Hibban.²⁸

5. Al-Thalathah.

Di dalam *Bulūgh al-Marām*, Ibn Hajar telah menerangkan maksud al-thalathah ialah tiga orang perawi *hadīth* iaitu *Imam Abū Dāwūd*, *Imam al-Tirmidhī* dan *Imam al-Nasā'i*. Di dalam pengertian al-thalathah terdapat empat orang perawi *hadīth* yang digugurkan iaitu Imam Ahmad bin Hanbal, Imam Bukhārī, Imam Muslim dan Imam Ibn Mājah.

Contoh *hadīth* yang menggunakan istilah al-Arba'ah ialah seperti berikut:

(٢) وعن أبي سعيد الخدري^(١) رضي الله تعالى عنه، قال: قال رسول الله ﷺ: «إن الماء طهور لا ينجسه شيء». أخرجه الثلاثة وصححه أحمد.

Maksudnya:

Dari Abi Sayd al-Khudri r.a, ia berkata bahawa Nabi s.a.w telah bersabda: sesungguhnya air itu suci, mensucikan yang tidak dinajiskan oleh sesuatu.

Hadīth riwayat Imam tiga dan disahihkan oleh Ahmad.²⁹

²⁸ *Ibid.*, h.67.

²⁹ Ibn Hajar, *Bulūgh al-Marām*, kitab al-Toharah, bab al-Niyah, h.9.

6. Al-Muttafaq ‘alayh.

Di dalam *Bulūgh al-Marām* Ibn Hajar telah menerangkan maksud al-Muttafaq ‘alayh ialah *Imam Bukhārī* dan *Imam Muslim* telah mensepakati periwayatan sesuatu ḥadīth dari sumber sahabat yang sama. Di dalam pengertian istilah ini terdapat lima orang perawi ḥadīth yang digugurkan iaitu Imam Ahmad bin Hanbal, Imam Abū Dāwūd, Imam al-Tirmidhi, Imam Nasā’i dan Imam Ibn Mājah .

Penggunaan istilah al-muttafaq ‘alayh terhadap ḥadīth-ḥadīth di dalam *Bulugh al-Marām* adalah terlalu banyak dan meluas yang meliputi di dalam setiap kitab dan bab. Di antara contoh ḥadīth di dalam kategori ini ialah;

Bermaksud;

“Dari Huzayfah bin ‘Alyman r.a berkata, Nabi s.a.w bersabda; Janganlah kamu sekalian minum di dalam bekas-bekas emas atau perak dan janganlah makan pada piring-piring emas atau perak kerana bekas-bekas itu untuk mereka (orang kafir) di dunia dan bagi kamu di akhirat.” Muttafaq ‘alayh.³⁰

KATEGORI SANAD ḤADĪTH

Bulūgh al-Marām sebagai sebuah karya dibidang matan al-ḥadīth telah memberi penekanan kepada aspek sanad ḥadīth. Memandangkan sanad ḥadīth terdiri dari 3 kategori yang utama, maka Ibn Hajar selaku penulis *Bulūgh al-Marām* telah menggunakan tiga kategori sanad tersebut terhadap ḥadīth susunannya. Tiga kategori sanad ḥadīth yang dimaksudkan ialah;

- i) ‘Isnad Ḥadīth Ṣaḥīḥ
- ii) ‘Isnad Ḥadīth Ḥasan
- iii) ‘Isnad Ḥadīth Daif.

Di dalam topik ini tumpuan akan diberikan terhadap contoh dari setiap kategori-kategori sanad ḥadīth yang terdapat di dalam *Bulūgh al-Marām*.

1. ‘Isnad Ḥadīth Ṣaḥīḥ.

Berhubung dengan persoalan ini, Ibn Hajar melalui karyanya *Bulūgh al-Marām* telah menggunakan ‘isnad ṣaḥīḥ terhadap ḥadīth-ḥadīth susunannya. Di samping itu beliau telah menyebutkan dengan jelas mengenai kesahihan ‘isnad terhadap sesuatu ḥadīth tersebut.

³⁰ *Ibid*, h.15.

Berikut akan diuraikan contoh 'isnad ḥadīth yang sahih seperti yang terdapat di dalam *Bulūgh al-Marām*:

(٦) وعن رجل صحب النبي ﷺ قال: نهى رسول الله ﷺ أن تغتسل المرأة بفضل الرجل، أو الرجل بفضل المرأة، وليغتربا جميعاً. أخرجه أبو داود والنسائي، وإسناده صحيح.

Maksudnya;

“Dari seorang sahabat Nabi SAW, dia berkata: Rasulullah saw telah melarang orang perempuan mandi dengan sisa air lelaki atau lelaki dengan sisa air perempuan.”

Ḥadīth ini diriwayatkan oleh Abū Dāwūd dan Nasā’i, sanad ḥadīth ini sahih.³¹

Berdasarkan ḥadīth di atas, Ibn Ḥajar telah menyebut di penghujung ḥadīth bahawa sanad ḥadīth tersebut adalah sahih walaupun tidak disebut nama periwayat yang pertama secara jelas dan nyata bahawa dia telah meriwayatkan ḥadīth itu dari Rasulullah SAW. Ibn Ḥajar hanya menyebutkan bahawa seorang sahabat Nabi s.a.w telah meriwayatkan perlakuan Nabi SAW. Menurut al-San’āni, yang dimaksudkan dengan seorang sahabat Nabi SAW itu adalah Dawud bin ‘Abdullah al-‘Awdi.³²

Tujuan sebenar Ibn Ḥajar menyebutkan 'isnad ḥadīth ini sebagai sahih ialah untuk menyangkal pendapat dari al-Bayhaqi dan Ibn Hazm. Al-Baihaqi menghukumkan ḥadīth di atas adalah Ḥadīth Mursal iaitu yang terputus sanadnya di samping ragu-ragu terhadap sahabat yang meriwayatkan ḥadīth tersebut.³³

Manakala Ibn Hazm mendakwa Sanad Ḥadīth yang terdiri dari perawi yang bernama Dawud bin ‘Abdullah al-‘Awdi adalah seorang perawi yang lemah. Oleh yang demikian bagi menyangkal tuduhan ini, Ibn Ḥajar telah mengisytiharkan bahawa Sanad ḥadīth di atas adalah Sahih kerana perawi yang dimaksudkan iaitu Dawud bin ‘Abdullah al-‘Awdi sebenarnya bukan seorang perawi yang lemah tetapi memiliki sifat-sifat perawi yang *thiqah*. Justeru itu ḥadīth di atas turut dihukumkan sahih berdasarkan hujah-hujah yang telah diuraikan.³⁴

2. 'Isnad Ḥasan.

Ibn Ḥajar melalui karyanya *Bulūgh al-Marām* telah menggunakan 'isnad ḥasan

³¹ *Ibid*, h.12.

³² al-San’āni, *Subul al-Salam*, jil. 1, h.5.

³³ *Ibid*.

³⁴ *Ibid*.

terhadap hadīth-hadīth susunannya. Ibn Hajar telah menyebutkan dengan jelas mengenai 'isnad hasan terhadap sesuatu hadith tersebut.

Berikut akan dihuraikan contoh 'isnad hasan seperti yang terdapat di dalam *Bulūgh al-Marām*.

(۱۳۸) وعن حمنة بنت جحش^(۲) رضي الله تعالى عنها قالت: كنت أستحاض حيضة كثيرة شديدة، فأتيت النبي ﷺ أستفتيه، فقال: «إنما هي ركضة من الشيطان، فتحيضي ستة أيام أو سبعة أيام، ثم اغتسلي، فإذا استتقت فصلي أربعة وعشرين أو ثلاثة وعشرين، وصومي وصلي، فإن ذلك يجزئك، وكذلك فافعلي كل شهر، كما تحيض النساء، فإن قويت على أن تؤخري الظهر وتعجلي العصر، ثم تغتسلي حين تطهرين، وتصلين الظهر والعصر جميعاً، ثم تؤخرين المغرب وتعجلين العشاء، ثم تغتسلين وتجمعين بين الصلاتين، فافعلي، وتغتسلين مع الصبح وتصلين، قال: وهو أعجب الأمرين إلي». رواه الخمسة إلا النسائي، وصححه الترمذي، وحسنه البخاري.

Bermaksud:

“Dan Hamnah bint Jahsh Ia berkata; Aku menderita istihadah dengan haid yang banyak sekali. Aku mengadap Nabi s.a.w mohon nasihat. Maka beliau bersabda: Sesungguhnya hal itu adalah gangguan dan syaitan. Maka hitunglah haidmu itu enam atau tujuh hari kemudian engkau mandi. Manakala engkau telah bersih, lakukan salat 24 atau 23 hari, berpuasa dan bersalatlah kerana demikian itu dapat mencukupimu. Demikianlah engkau lakukan setiap bulan sebagaimana wanita menjalani haid. Apabila engkau kuat mengakhirkan salat zuhur dan mencepatkan salat asar lalu engkau mandi ketika engkau suci dan engkau lakukan salat zuhur dan asar jama', kemudian engkau akhirkkan salat maghrib dan mencepatkan salat isha' lalu engkau mandi dan kumpulkan antara dua salat itu. Dan mandilah berserta subuh dan salatlah. Sabdanya lagi demikian itu yang lebih aku sukai dari yang lain.”

Hadīth riwayat oleh Imam yang lima kecuali Nasā'i disahihkan oleh Tirmidhī dan dianggap hasan oleh Bukhārī.³⁵

³⁵ *Ibid.*, h.47

Berdasarkan *ḥadīth* di atas Ibn Hajar telah menyebutkan bahawa *ḥadīth* ini telah diriwayatkan oleh perawi yang lima (*khamsah*), kecuali al-Nasa'i iaitu Ahmad, Abu Dāwūd, Tirmidhī dan Ibn Mājah. Dan sudut kualiti *ḥadīth*, Ibn Hajar menyebutkan bahawa Tirmidhī menganggap *ḥadīth* tersebut sebagai *Ḥadīth Sahih*, manakala Bukhārī menganggapnya sebagai *Ḥadīth Hasan*.

Dari sudut pengkajian sanad, perbezaan pendapat ini disebabkan oleh kualiti perawi *ḥadīth* tersebut. Menurut al-San'āni, sebahagian 'ulama *ḥadīth* termasuk Bukhārī menganggap *ḥadīth* tersebut sebagai *Ḥadīth Hasan* kerana 'Abdullah bin Muḥammad bin Uqai'l sebagai perawi *ḥadīth* telah dinilai kurang baik dan sudut ketepatannya (*dabit*).³⁶

Walaupun begitu tidak sampai bertaraf *ḍaif*. Di samping itu Tirmidhī dan Imam Ahmad telah menghukum *ḥadīth* ini sebagai *Ḥadīth Hasan Sahih*. Oleh yang demikian *ḥadīth* tersebut masih boleh menjadi hujah atau dalil di dalam masalah agama.

Daripada contoh dan huraian yang berkaitan dengan 'Isnad Hasan, jelas menunjukkan kualiti sesuatu *ḥadīth* tersebut di dalam beberapa keadaan turut dipengaruhi oleh kualiti 'isnad. Walaupun 'ulama *ḥadīth* berbeza pendapat di dalam menilai sesuatu *ḥadīth* akan tetapi tujuan mereka hanyalah untuk memastikan kualiti atau kesahihan sesuatu *ḥadīth* benar-benar terpelihara daripada penyelewengan.

3. 'Isnad *ḍaif*.

Di dalam topik ini perbincangan akan ditumpukan terhadap penggunaan 'isnad *ḍaif* di dalam *ḥadīth-ḥadīth Bulūgh al-Marām* yang disusun oleh Ibn Hajar. Di dalam *Bulūgh al-Marām*, penggunaan 'isnad *ḍaif* disebut secara jelas oleh Ibn Hajar. Berikut adalah contoh 'isnad *ḍaif* seperti yang terdapat di dalam *Bulūgh al-Marām*.

عن عيسى بن يزداد⁽¹⁾ عن أبيه⁽²⁾ قال: قال رسول الله ﷺ: «إذا
بال أحدكم فليشتر ذكره ثلاث مرات». رواه ابن ماجه بسند ضعيف.

Bermaksud:

“Dan 'Isa bin Yazdad dari ayahnya ra ia berkata bahawasanya Rasulullah bersabda; jika salah seorang dan kamu selesai kencing hendaklah mengurut zakarnya 3 kali.”

Ḥadīth riwayat Ibn Mājah dengan sanad *ḍaif*.³⁷

³⁶ *Op.cit.*, *Subul al-Salam*.

³⁷ Ibn Hajar, *op.cit.*, h.6.

Berdasarkan ḥadīth di atas al-San'āni telah menerangkan bahawa perawi yang disebut sebagai Isā dan ayahnya adalah tidak dikenali. Menurut al-Nawawī, ḥadīth tersebut adalah ḍaif kerana mengambil pengertian yang hampir sama dengan ḥadīth yang diriwayatkan oleh Bukhārī dan Muslim yang berhubung dengan dua orang yang disiksa di dalam kubur kerana tidak dibersihkan kencingnya.

Oleh yang demikian ḥadīth ini sebenarnya bertujuan untuk memperjelaskan lagi pengajaran daripada ḥadīth yang telah diriwayatkan oleh Bukhārī dan Muslim berhubung dengan masalah adab-adab membuang air walaupun sanadnya dihukum ḍaif oleh 'ulama ḥadīth.

PENUTUP

Daripada huraian dan contoh di dalam perbincangan ini jelas memperlihatkan ciri-ciri ilmiah pada ḥadīth-ḥadīth susunan Ibn Ḥajar yang menghimpunkan berbagai kategori sanad samada ṣahih, ḥasan dan ḍaif. Metodologi seperti ini amat penting kepada pengkaji ḥadīth masa kini supaya dapat menilai tahap penapisan sesuatu hukum Islam yang telah diperolehi oleh 'ulama seperti di bidang ḥadīth ini.